

¡BOMBA!

Ahora en marzo, ya es por ley,
presentarse donde toca;
ahí leer nos convoca,
¡hay que ir a la FILEY!



K'intsil

Martes 17 de marzo de 2026

CAMPECHE · YUCATÁN · QUINTANA ROO · AÑO 11 · NÚMERO 2684 · www.lajornadamaya.mx

Ichil u noj k'iimbesajil Filey 2026e' yaan u yu'uba'al jejeláas t'aano'ob ich maaya

Le 14 ti' marzo máanika', chún u noj cha'anil xook ku k'aaba'tik Feria Internacional de la Lectura Yucatán 2026 tu'ux ku kóojol ya'abach ajts'iibo'ob beyxan máaxo'ob jach uts tu yicho'ob xook ti' le noj lu'umila', ba'ale' beyxan ti' uláak'o'ob.

U k'iimbesajil xooke' táan u beeta'al tu kúuchil Centro de Convenciones Siglo XXI tu noj kaajil Jo', yéetel jo'olbesa'an tumen u noj najil xook Universidad Autónoma de Yucatán (UADY). Te'el ja'aba' páayt'anta'ab beey iinbitaado de oonor u noj najil xook

Universidad Autónoma de Baja California; yéetel u noj t'aanil Fileye', "Penínsulas Lectoras".

Te'el noj múuch'tambala', ku yu'uba'al jejeláas tsikbalo'ob, yaan xan e'esajilo'ob, ku ts'a'abal k'ajóoltil áanalte'ob, kaambalo'ob, tsikbalo'ob, ichil uláak' ba'alo'ob. Ts'o'oke' maaya t'aane' ma' xan táan u p'aatal paachili'. Yaan xan jejeláas ba'alo'ob yaan ba'al u yil yéetel, je'el bix le je'elo'oba': bejla'a 17 ti' marzoe' yaan u yantal u ye'esajil Nikte' T'aan, las 9:30 ja'atskab k'iin, tu kúuchil gran foro Uxmal, tu'ux kun u'uybil

tsikbal, k'aay yéetel paax, jo'olbesa'an tumen u mola'ayil Dirección de Educación Indígena ti' u mola'ayil SEGEY. Beyxan leti'ob xane' yaan u beetiko'ob u tsikbalil Tene' kin meyajtik WIKIPEDIA, lela' tu k'iinil 21 ti' marzo, las 12 chúumuk k'iin, tu kúuchil salón Chichén Itzá.

Uláak' tu'ux yaan u yu'uba'al maaya t'aane', tu stand u Ayuntamientoil Jo', u mola'ayil Instituto Municipal para el Fortalecimiento de la Cultura Maya yaan u ye'esik balts'am de guiñol, le je'ela' tu k'iinil 19 ti' marzo, las 3 u taal u chíinil k'iin. Tu k'iinilo'ob 17, 18 yéetel 20e', yaan u beeta'al u kaambesajil Bix a wanil, láayli' tu standil 128. Te'el xano' ku béeytal u kaxta'al yéetel u ma'anal jejeláas áanalte'ob ts'iibta'an yéetel yaan ba'al u yil yéetel maaya miatsil.

Te'el k'iinil 17 xana' yaan u ts'a'abal k'ajóoltil u áanalte'il U yuumilo'ob kaláant múul, ts'iibta'an tumen Luis Antonio

Canché Briceño, tu kúuchil Uxmal 4.

Tu k'iinil 20e', yaan u yantal u kaambalil Le úuchben T'aano'ob Láayli Kuxa'ano'obe', beeta'an tumen Silvia Interián, yéetel jo'olbesa'an tumen Koox Xook-PNSLY, tu kúuchil Ek Balam, sala 1. Yaan u beeta'al xan u tsikbalil La lengua maya como mecanismo de resistencia y fortalecimiento cultural, tumen Fidencio Briceño, tu kúuchil Dzibilchaltún. Ts'o'oke' yaan xan u chúnul U múuch'tambalil máasewal ts'iib 2026, tu kúuchil Uxmal 3, tu'ux yaan u táakpajal ajts'iibo'ob Donny Limber Brito, Galdis Uc, James Sarao, María Luisa Castro; beyxan uláak'o'ob ku taal ti' uláak' kaajo'ob je'ex Martin Tonameyotl yéetel Rosario Patricio, ichil uláak'o'ob.

Noj cha'ane' yaan u ts'o'okol le 22 ti' marzo ku taala', yéetel ku páajtal u xak'alta'al uláak' ba'alo'ob tu kúuchil filey.org.

Oochel jusaeri

